

Bernard Cathomas e David Spinnler


Dus Rumantschs entran da nov en il cussegl da pressa svizzer

■ (anr) Dacurt è vegni enconuschent midadas en il presidi dal cussegl da fundaziun dal Cussegl svizzer da pressa. Nov pasura da quel daventa davent dal 1. da fanadur 2012 Bernard Cathomas, anteriur directur da RTR. El è successur dal schurnalists tessinais *Enrico Morresi* che sa retira cun la fin da quest onn. Durant l'emprim semester da 2012 vegn *Philipp Cueni*, chauredactur dad «Edito + Klartext», il magazin da medias, a surpigliar intermisticamain il presidi.

Il Cussegl svizzer da pressa cumpiglia 21 commembers. Da nov fa part – cun *David Spinnler* – per l'emprima giada er in Rumantsch dal cussegl da pressa. El è manader da redacziun da RTR en l'Engiadina ed è vegni proponì da la secziun sindacalista da medias (SSM) a Cuira. President dal cussegl da pressa è dapi primavaira passada *Dominique von Burg*, redactur da la «Tribune de Genève».

Cussegl da pressa: istanza da recurs

Il cussegl da pressa è vegni fundà – sco ina fundaziun – 1975 tras l'unìun da schurnalists e schurnalistas. Dapi 2000 fan era la conferenza dals chauredactors ed il sindicat Comedia part. Era l'uni-



Bernard Cathomas (san.) daventa nov pasura e David Spinnler (dretg) nov commember dal cussegl da pressa svizzer.

FOTOS LQ

un dals editurs e la Societad da radio e televisiun svizra (SSR) èn daventads 2008 purtaders dal cussegl da pressa.

Il cussegl da pressa è l'istanza da recurs (u reclamaziuns) per dumondas eticas tar ils meds da massa (tschertgar la vardad, libertad d'infurmaziun, pluralissem d'opiniuns, separar fatgs e commentaris ed obligaziun da recti-

fitgar). El surveglia ils meds da massa svizzers e propona co il consument (lectur, auditor ed aspectatur) po vegnir tar infurmaziuns objectivas. El n'ha dentant nagina pussaivladad giuridica dad influenzar. Era na sa el betg scumandar ina publicaziun, mabain sulet recumandar. Dal reminent ha quest cussegl er edì in codex da pressa che cuntogna ils

dretgs sco era las obligaziuns da schurnalistas e schurnalists.

Il cussegl da fundaziun dal Cussegl svizzer da pressa, presidià da *Bernard Cathomas*, è cumpetent per la finanziaziun, fixar las finamiras e l'organisaziun da quell'istanza da recurs per dumondas che pertutgan l'etica tar ils meds da massa en Svizra.

